

No. 907 [cf. No. 905]

佛顶尊胜心破地狱转业障出三界秘密陀罗尼

中天竺国三藏善无畏奉 诏译

(四)名金刚鼓。(二)口开舌举震法界宫。莲华藏诸如来出定。即以摧破地狱灭七遍之殃。起教菩萨(善住天子也)说五字秘密。执本授。如法布字。人主顶戴乎冠中。万国清泰。节度观察。旌旗上书写真言。四方晏静。专城太守镇遏总戎。鼓角上题字严警。远闻妖气潜。炽盛布千里。苗稼洪润人无灾疾。地土神祇风恬雨顺。(一)瑜伽事法约有千条。略述少分。(三)念诵加持战鼓上书。贼军自降一人不损焉。(五)佛言。阿字金刚部主肝。鏤字莲华部主肺。[廿/览]字宝部主心。哈字羯磨部主胃。欠字虚空部主脾。山海大地从阿字出。江河万流从鏤字出。金玉珍宝日月星辰火珠光明从览字成。五谷五果众花开敷因哈字结。秀香美人天长养颜色滋味端正相貌福德富贵从欠字庄严。阿字是东方阿閼如来。鏤字西方阿弥陀如来。览字是南方宝生如来。哈字北方不空成就如来。欠字是上方毘卢遮那大日如来。阿字甚深空寂之体。取之不可取。舍之不可舍。万法之母。大灌顶王阿字是也。阿字是难信之法。小乘律师特勿令见。此本五部梵本四十万言出。毘卢遮那经金刚顶经采集要妙。最上福田。唯此五字真言。诵者所获功德不可比量不可思议不可说也。金刚顶经五部真言。受持读诵观照理性。令人获福。骨坚体健。永无灾障及诸病苦。摄养长寿(五藏曼荼罗是五部法身)阿金刚地部一(阿字作地观金刚座观)鏤金刚水部二(鏤字作水观莲华观)览金刚火部三(览字作日观)哈金刚风部四(哈字作月观)欠字金刚空部五(欠字作空观)如来体性无生观 右五部真言。是一切如来无生甘露之珍浆醍醐佛性之妙药。一字入于五藏万病不生。况修日观月观。实时修得佛身空寂 五分法身义。阿鏤览哈欠

右上五法身真言。若日诵一遍或七遍二十一遍或四十九遍者较量功德。一遍福如转藏经一百万遍。何况禅寂坐入定门。从阿字观谛审分明。如日照空。即是了见佛性。所获福无有比量。秘藏文句实不思议。只恐声闻法师。小乘持律者。生疑不信反益其罪。譬如王有稚子偏最怜念库藏珍宝倾竭不惜。唯不与干将镆鄢恐不解运用故伤其体。是故如来密传大菩萨。不与声闻劣慧。已下三个真言是三种悉地。成就法中立上中下品差别也。

阿罗波遮那(此是下品悉地真言)是名出悉地。能生根茎遍满四方。诵一遍。如转藏经一百遍。

阿微罗[合*牛]佉(此是中品悉地真言)大日经悉地品。名降伏四魔解脱六趣满足一切智智金刚字句也。是名入悉地。能生枝叶。遍满四方。光明晃曜入佛法界。名入悉地。若诵一遍。如转藏经一千遍。

阿鑊蓝哈欠(是上品悉地真言也。以前五三印真言。顺一遍逆一遍。次顺旋转四遍。次逆旋转四遍。此即利益一切众生皆以悉地义也)是名秘密悉地。亦名成就悉地。亦名苏悉地。苏悉地者遍法界也。成就佛果。证大菩提。法界秘密言。光明遍满。唯佛与佛能入此门。缘觉声闻不能照。此亦名秘密悉地。若诵一遍。当如转藏经一百万遍。出悉地从足至腰。入悉地从脐至心。秘密悉地从心至顶。如是三悉地。出悉地化身成就。入悉地报身成就。秘密悉地苏悉地法身成就。即是三种常身正法藏。是故稽首礼毘卢遮那佛。

稽首毘卢遮那佛	开敷净眼如莲华
三界调御天人师	大菩提心救世者
深妙真言加持法	流入无生阿字门
白毫无相正遍知	圆满恒照如日月
阿闍宝生救世者	弥陀成就不空王

咸于悉地吉祥轮 传斯妙法化诸有
慈心自在降三世 金刚萨埵不动尊
无违誓愿应时期 瑜伽事毕还金刚
我依毘卢遮那佛 开心智印建标仪
无量功德普庄严 同入总持诸善逝
愿共有缘修学者 安住无上清净海

佛顶尊胜心破地狱法一卷(以后杂要文也)

本批云。治历二年六月一日。于肥前国。以但石藏圣御房本书写毕。僧静暹。

贞和二年丙戌七月十八日。自金刚王院僧正御房御手下赐之毕。权少僧都文海(五十四岁)。

天明元年辛丑闰七月十七日。以宇治慧心院藏。本写得讫。慈忍

八家秘录云。尊胜破地狱陀罗尼仪轨一卷(是三种悉地法)应知所明法未显题额。是故有此注记。盖是此本乎。

时享和改元秋七月授以上木。

丰山轮下快道志

【经文信息】大正藏第 18 册 No. 0907 佛顶尊胜心破地狱转业障出三界秘密陀罗尼

【版本记录】CBETA 电子佛典 Rev. 1.10 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅**【中华电子佛典协会数据库版权宣告】**
